



# Daifim

An Official Organ of YMA, Khuangpuilam Branch.

## YMA MOTTO



Hunawl hman that  
Zofate hmasawwna ngaihtuah  
Kristian nundan tha ngaihsan

Khawchin : Source - Accuweather.com



Ruah a sur rin a ni.  
Temp - Max: 26°C Min: 21°C  
Dar 4:31-ah ni a chhuak ang a,  
Tlai Dar 6:03-ah a tla leh ang.

Vol - VI Issue No. - 19

- Tomir Thla -

31<sup>st</sup> May, 2020 (Pathianni)

**Tunkar chang vawn : Mat 6:25**

"Chuwâng chuan, ka hrilh a che u, in nun nân eng nge in ei anga in in ang tih te, in taksa tân eng nge in sin ang tih te lungkham suh u. Ei tûr aiin numna a pawimawh zâwk a, silhfên aiin taksa pawh a pawimawh zâwk lo vem ni?"

## TUALCHHUNG CHANCHIN

☛ Pu H. Lalmuanpuia, BEC member, chu tunah Zemabawk cancer Hospital, Aizawlah Radiation tiin a awm mek a. Radiation wawi 35 tih turah wawi 9 vel ti tawhin, radiation a tih chhungin Chemotherapy hi kartin wawi 1 khai a ni dawn bawk a ni.

Naktuk chawhma dar 9-ah a la tan leh dawn a ni. Tluang tak leh tha taka inenkawl a, damna chang ngei turin duhsakna kan hlan e.

☛ Khuangpuilam Village Council hmalakna in Khuangpuilam Field, Thlanmual thlang a mi chu siam mek a ni a. Ni 26 May, 2020 (Thawhlehi) tlai dar 3:00 khan hmun thenkhat lai leh a rual rem lo lai hal a ni.

Kan khawtlang hotute hmalakna a fakawmin veng mipuite paw'n kan theih tawp chhuaha kan puihbawm a ngai tih hre thar leh ang u.

## COVID-19 Frontline Workers te tan Insurance

'Task Group on Insurance for Frontline Workers fighting Covid-19'-in a rawt angin COVID-19 dona kawnga a hmatawnga hnathawktute an boral palhin, an chhungte'n luman Insurance cheng nuai 20 an dawng thei anga; mahse, hei hian Central Civil Services (Pension) Rules, 1972 ina a huam loh sawrkar hnathawk chungkuate chauh a huam ang a. PMGKY Insurance Scheme ina a huam loh sawrkar hnathawk chungkuate chauh in hetiang luman hi an dawng thei ang.

He hamthatna hian COVID-19 avanga March ni 31, 2021 hmaa boralte a huam ang.

## CM-i'n Zampui Tlang Mizote hnaiha Bru dah tumna chu thil tih chi a nih loh thu Tripura CM leh Union Home Minister hrilh

*Dated Khuangpuilam, the 24<sup>th</sup> May, 2020 (Pathianni) :* Tomir thla ni 29, 2020 khan Chief Minister Pu Zoramthanga chuan Union Home Minister Amit Shah leh Tripura Chief Minister Biplab Kumar Deb te chu lehkhah thawnin, Mizoram atanga Bru Tripura a raltlante dahnghehna atana Mizote chenna Zampui Tlang leh a chhehvel ruahman tum chu kumin kumtira Quadripartite Agreement lo neih tawhin a thiltum leh inremna rilru (spirit) a kalh thu leh, helai hmuna Bru dahngheh tumna chu sut turin a hrilh.

January ni 16, 2020-a Home Ministry leh Mizoram leh Tripura sawrkar aiawhte leh Bru-Reang hnam aiawh ten New Delhi-a inremna thuthlung an lo ziah tawhin a thiltum laimu chu tuna Tripura sawrkar hmalakna hian a kalh thu Chief Minister hian a lehkhah hian a ziaak a. Hun rei tawh tak atanga Mizoram leh Tripura ah pawh Mizote leh Bru hnam inkara inhmuh thiamlohna lo awm fo tawh thin avangin tuna Tripura sawrkar ruahmanna hian boruak duhawmlo a hrinchhuah palh a hlauhawm thu lehkhah ah hian a ziaak.

January ni 16, 2020 Inremna chu a taka a hlawhtlin ngei theih nan Bru raltlante hi Tripura-a Mizo chenna biala dah loh a tul thu Chief Minister chuan ziaakin, Tripura Chief Minister chu Zampui area nilo, hmun remchang tha zawkah Bru raltlante awmnghehna tur ruahman ngei turin a ngen a ni.

Mizoram Chief Minister chuan kum 1998-a Mizoram atanga Tripura-a Bru raltlante leh Tripura-a Mizote inkara boruak awm avangin Mizoten an sahchhuah Sakhan Tlanga Mizo khaw pali (4) lai chu an lo rauhsan tawh thu a tarlang a. Tripura Sawrkar ruahmanna siam chu ngaihtuah that ngai thil a nih thu leh tuna Bru awm nghehna tura an ruahman chu tihtawp a nih theih nan a tul anga inrawlh turin Union Home Minister chu a ngen a ni.

Wawin khan Tripura Mizo Convention huaihawtin Mizo ramri chin ven hnathlang Zampui Tlang hmun hrang hrangah neih a ni a. Dr. Zairemthiam Pachuau, Gen Secy, Mizo Convention chuan Mizoram Chief Minister Pu Zoramthanga'n an harsatna hriaa Union Home Minister leh Tripura CM hnena Zampui Mizote thlavang hauhna leh an hnaivaia Bru dahngheh tuma rawtna awm mek sut vat tura huaisen taka a rawt chu Tripura Mizote tan a hluin a chungah an lawm hle a ni tih a sawi.

## Motor tlan dan tur chungchanga Kolasib Bawrsap thuchhuah

Delhi atangin kan Mizo unaute'n Bairabi Rail Station, Bairabi lo thlengin District hrang hrangah thawn darh an ni dawn a. Khualzinte mahni District theuh tluang taka an thlen theih nan leh natna inkaichhawn theih laka mipuite kan him tlan zawk theihnan thupek chhuah tulin ka hria a.

Chuvangin, Kei, Dr. H. LALTHLANGLIANA, MCS, DISTRICT MAGISTRATE, KOLASIB DISTRICT hian The Mizoram Epidemic Diseases (COVID - 19) Regulation, 2020 Clause 11 (1) in thuneihna min pek angin, hetiang hian thupek ka chhuah e.

1. Ni 30.05.2020, zan dar 08:00 atanga ni 31.05.2020, chhun dar 12:00 emaw Delhi khualzin phur Bus tawp ber a chhuah fel hnu darkar khat (1) hnu thleng Bairabi leh Zero Point (☞ Phek 2-na)

**YMA chu tanpui ngaite tanpuitu a ni. – YMA Kumpuan : Zirna uar**

Editorial Board :

Editor: Pu Ricky MS Dawngzela  
Jt. Editor : Pu Lalsiamkima  
Treasurer: Nl. Florence Zoremsangi  
Cir.Manager : Tv. Samuel Lalpekhlua  
Contact No: 9862501858 / 9612691291  
9612761781 / 7005494983

FLS Station - 9612566886

Chawngbawla Section

Leader : Pu F. Lalbiaksanga  
96121 55162  
Secretary : Tv. R. Lalnuntluanga  
82599 60032

Vanapa Section

Leader : Pu Lalchuaailova  
87300 99599  
Secretary : Tv. Lallawmzuala  
87875 41803

Khuangchera Section

Leader : Pu Lalramzaau  
76408 95924  
Secretary : Pu Zachungnunga Hrahse  
76299 69989

Editorial.....

Principle nghet neih a tul

A sap tawng thiam ber awmin  
'Principle' kan han titah a, Pu JF-a  
chuan, 'thurin bul' 'chet dan tur' 'chet  
dan dik' tiin a sawi a. Nunphung  
kaihruiatu tur thurin ti te pawhin dah  
ila a sual awm lo ve.

Tam tak nunphung han en hi  
chuan principle nghet nei lo, mi thlek  
dana thle thle mai, mahni ngaihdan aia  
mi ngaihdan ina a hruai, mi tihdan  
apiang zui ve mai tum, mahnia chhia  
leh tha hriatna hman pawh tum lo,  
midang thuhnuai kûn tlat ni a inhria  
hi a awm theih.

Ni e, midang ngaih chan thiam  
hi tih dan maw leh tha tak a nih rualin  
midang ngaichang reng renga hun  
hman erawh hma lam pan a har. Tawn  
hriat lo nei tam tawhte sawi lo zawm  
mai pawh thil tha tak a ni, mahni ngeina  
zir chhuah pawh thil tangkai leh nghet  
hriatna nghet tak a ni. Midangte thu  
dawn thiam tak nih pawh buaina laka  
fihlimna a ni ang bawkin ngaihdan fel  
tak chher chhuak thiam mi pawhin  
kawng a ti awlsam a ni.

Thil reng reng hian thatna a  
neih chuan chhiatna a nei tel ve tih kan  
hriat hi thil finthlak tak a ni. Harsatna  
tam tak pal tlang thei mi te; midangte  
aia harsatna tam tak pumpelh thei thin  
mi te; a sum neih a tlem emaw a tam  
emaw a nih pawha leiba ngah tun lo mi  
te; a zir sang emaw sang lo emaw chung  
pawha khawtlang nu rawn pa rawn ho  
te; nun kawng uluk taka chhuia zawh  
thin mite hi 'Principle' tha tak nei leh  
chu principle zawm tlat thin mi te an  
ni tlangpui a ni.

Branch YMA Office Bearer

<b>President</b> Pu HD Daniala 9863212083	<b>Secretary</b> Pu Lalremsiama Varte 9862327112	<b>Treasurer</b> Pu David lalrosanga 9436158962
<b>Vice President</b> Pu S. Lalthangliana 8787326114	<b>Assistant Secretary</b> Nl. Florence Zoramsangi 9612761781	<b>Financial Secretary</b> Pu Rotlingpuia 9862385193

(Phek 1-na zawmna)

(Saihapui peng) inkar ah  
mihring leh lirthei eng chi mah  
kal phal a nilo.

2. Khualzin lo thleng te Private  
motor a inlam leh inhmuah  
phal a nilo.

He thupek zawm lo te chu  
'Disaster Management Act,  
2005, section 51 atanga section  
60, The Mizoram (Containment  
& Prevention of COVID -19) Or-  
dinance, 2020 hmangin hrem  
theih an ni ang.

He thupek hian COVID -  
19 dona atana Sawrkarin Duty  
tura a ruatte leh phalna pek bik  
te a huam lovang .

He thupek hi vawiin  
30.05.2020 hian Court Seal  
chhu in hming ka ziah hnan e.

Directorate of Health Services  
hnuaiia Controlling and  
Licensing Authority  
ngenna leh hriattirna

COVID-19 laka invenna  
hmanrui pakhat 'Face Mask' chu  
rampumah indaihlohna a nasat  
avangin Commerce & Industries  
Department hmalaknain Face  
Mask chi hnih - Woven Fabric leh  
Non-Woven Fabric siam a ni a.

Hengte hi WHO leh  
MoH&FW approved specification  
ang thlapa siam an ni tih Control-  
ling and Licensing Authority-te  
chuan mipuite a hriattir a.  
Mizoram chhunga damdawi zuar  
zawng zawngte chu phai lam  
atanga 'Face Mask' chah rih lova,  
Mizoram chhunga siamchhuah  
ngei chauh zuar tawh tura ngen  
leh hriattir an ni. Director, Com-  
merce & Industries Department -  
ah engtik lai pawha lei theihin a  
awm reng a ni.

He ngenna leh hriattirna  
hian Face Mask lakluh leh hralh  
chungchanga thu leh awm hma  
zawng a huam ang.

ten tranning an pe nghal a ni.

Truenat Covid-19 test hi  
ICMR-in RT-PCR tluka rintlaka a  
ngaih a ni a, he khawl hi quality  
run pass leh ICMR a registration  
tih fel anih hunah COVID-19 test  
na atan hman theih a ni ang.

CYMA hmalakna

**22.5.2020** : Pu Vanlalthlanpuia (38) S/o  
H.S. Lalmangaiha Electric Veng, Aizawl  
12.5.2020 atanga chin hriat loh a bo chu,  
Electric Veng Branch YMA leh khawtlang  
mipuiin theihtawpchuah an zawn  
hnu-ah an la hmuh loh avangin ni 22 &  
23.5.2020 khan Central YMA ruahmanna  
in Aizawl Khawpui chung Branch YMA  
thenkhatte chu Group Ahrang hrangah  
thenin, mibo zawn hna hi thawh a ni a.  
Mizo dana ni 7 leh zan 7 chung zawn a  
nih hnuah pawh hmuh anih tak loh  
avangin ni 23.5.2020 dar 3:00pm khan  
Phunchawng RV-ah bo zawn khar  
Programme hman a ni. Programme hi  
Pu Fabian Lalfakawma, Treasurer-in a  
kaihrui a, Pu Vanlalruata, President; Pu  
K. Lalthanmawia, President, Electric  
Veng Branch YMA te bakah mibo  
chhungten thu an sawi a, Pastor  
Biaksailova, Electric Veng-in kharna hun  
a hmang. Mibo zawnna ah hian Central  
YMA OB, CEC leh Central Disaster Re-  
sponse Team ten an ho thin.

**26.5.2020** : YMA Senior mi 35 ten hriven  
thawhlawm atana an thawhkhawm ₹  
58,000/- chu Central YMA-ah an hlan a.  
A thawhtute duh danin Langkai Group,  
Zampuimanga Group, Khawthlang-  
tuipui Group, Tuipuiral Group, Serlui  
Group (Vairengte)-ah te ₹. 11,600/-  
theuh a sem turin ni 26.5.2020-a OB  
Meeting chuan ruahmanna a siam.

COVID-19 test Lungleiah  
tih theih thuai dawn

Tomir thla ni 29, 2020  
(Zirtawpni) khan Indian Council of  
Medical Research Guidelines  
angin National Health Mission,  
Mizoram hmalakna in Civil Hospi-  
tal, Lunglei-a Biosafety Level-2  
laboratory ah COVID-19 sample  
test-na atana hman turin Molbio  
Truenat khawl 2 chu hman mai  
theih tura bun a ni.

He khawl hi NHM hnuaiia  
programme pakhat National TB  
Elimination Programme hnuaiia  
bun niin, Civil Hospital, Lunglei-a  
thawk mek Dr. RSC Vanlalruati,  
Microbiologist; Z.D. Lalremruati,  
IDSP Microbiologist leh Lalhriathlui  
Khangte, Laboratory Technician-  
te hnenah hian State Nodal Officer,  
Truenat COVID-19 Testing, Dr.  
Krossnunpuui leh K.Lalrinsanga,  
Sr, Laboratory Technician



**Mi bik chanchin****HENRY MALSAWMTLUANGA (Kawrthah)**

Kum 2018 MPSC Combined Competitive Exam a tling, tlangval chhuanawm tak mai, Henry Malsawmtluanga chanchin kan tar lang dawn a. Zir tur kan neihte zir chhuaka, entawn tur kan neihte entawna mi hlawhtling nih ve ngei kan tum dawn nia.

Henry Malsawmtluanga hi Kawrthah, Mamit District -a piang leh sei lian a ni a. Kawrthah School ‘Hallidays English Medium School’ atangin KG 1 atanga Class VII a zir a. High School chu Govt. Kawrthah High School -ah Matric thlengin a kal a ni. High School a kal lai hian Maths leh Science subject hi a thiam vak bil lova, HSLC Board exam ah pawh III Division ah a passed a ni. Higher chu Chaltlang Higher Secondary School-ah a kal a, Class XII Board exam -ah hian 1st Division-ah a passed a ni.

Class XII a zawh hnu hian PUC, Aizawl-ah Political Science Subject zir chhunzawmin B.A final exam -ah hian 1st Division a passed a, Mizoram pumah Political Science subject bikah chuan palina(4th rank) a hauh phak nghe nghe a ni. B.A a zawh hnuah Mizoram University ah MA (Pol Sc) a zir chhunzawm a, Political Science ah hian pakhatna niin Gold Medalist a ni. MA 3rd semester a zir laiin college Asst.Professor ni tura neih ngai UGC buatsaih NET a exam a, Political Science subject atang hian NET Junior Research Fellowship(JRF) a hmu nghe nghe a ni. JRF neite tan hian M.Phil tih buai ngai lovin direct-in Ph.D a zawm theih avangin, MA a zawh velah MZU -a Political Science department-ah tho hian International Relations area-ah Ph.D a tih zawm nghal a. Kum 2014 -ah NET a exam leh a, International and Area Studies subject -ah NET Junior Research Fellowship(JRF) hi a hmu leh nghe nghe a ni.

MZU -a Ph.D a tih mek lai hian a supervisor Prof. JK Patnaik-a hriatpuina leh phalnain Delhi-a ALS Coaching Academy-ah Civil Service atan coaching a kal a, kum 2015 ah Mizorama lo let lehin MPSC Combine Competitive Examination chu a vawi khat nan a hmachhawn ve ta a, hemi kum hian interview stage chu a thleng nain, final result -ah a tling ta lova. Hemi kum vek hian UPSC Civil Service Examination a hmachhawn leh a, Preliminary examination a paltlang nain Mains exam erawh a pal tlang zo ta lo a ni.

Kum 2016 khan MPSC Combine Competitive Examination hi a hmachhawn leh a, hemi tum hian Mizoram Police Service (MPS) -ah a tling a. Kum 2017 -ah North Eastern Police Academy (NEPA) Shillong Barapani-ah training-in kum 2018 ah probationary period hmangin Aizawl-ah a inzir a, Kum 2019 Feb thla khan posting nghet neini Sakawrdai-ah Sub-Divisional Police Officer(SDPO) -in a awm ta a ni.

Kum 2018 khan MPSC Combine Competitive Examination a awm leh dawn tih hriain exam turin a inbuatsaih leh a, hna nei a nih tawh avangin duh angin a inbuatsaih theih lova, Prelims exam a paltlang hnuah thla khat chawlh lain Mains exam turin a inbuatsaih leh ta char char a. Pathianin a inbuatsaihna mal a sawm a, a duhna ber MCS-ah a lo inhlangkai leh ta a ni.

A mah hian Pathian tih hlawkzia a hria a, eng kawng pawh zawh ila, Pathian tih hmasak tul zia a hre chiang hle a ni. “Eng pawh ti ila, engpawh zir ila, eng pawh thawk ila kan nuna pawimawh ber chu Pathian tih hi a ni,” a ti. Thufingte bung 4:8a kan hmu, “Chawimawila, anin a chawi sang ang che,” tih hi Henry-a inngahna pakhat a ni baw. Pathian kan chawimawi phawt chuan aman min tiam angin mal min sawm ang a, sang takah min dah mai dawn a ni.

Nu leh pate zah leh an thu awih mi tak a ni a. Kan lei Pathian kan nu leh pate thuawih hi hlawhtlinna kawnga min puitu a ni tih a hre chiang em em baw a ni.

Henry-a zirna chanchin kan tar lan takah hian HSLC chu a ti tha bik miah lo, third division -ah a passed ve hram. Mahse, Class XI atangin Aizawlah lehkhha a zir chhunzawm a, thingtlang chhuak a nih avangin a calssmate thiam thei deuhte el phak turah a dah ngai lova, a insit thin hle a, amah aia thiam leh fing vek turah a lo dah thin. Amaherawhchu, hma sawn chho zelin Class XI chu 1st div a passed ta a, Class XII pawh 1st Division ah tho a passed leh a. Heng a result te hian amahah inrin tawkna nasa tak a siamsak a, thingtlang mi, thingtlang school atanga zir chhuak a nih avang ngawta thiam thei lo bik leh khawpui mite el phak lo tura a lo inhriat thinna chu a dik lohzia a hmu chho zel a ni. Thian kawm tam lo leh pawn chhuak tam lo mi a ni a, a zirlaiah rilru a pe thin hle. Hmasawn tum tlat mi a nihna chuan amahah tumruhna leh taimakna a thlen a, a matric result Third Division atanga MA Gold Medalist leh Mizoram Sawrkar hna sang MPS (Mizoram Police Service) leh MCS(Mizoram Civil Service) te hial inziak tling thei dinhmuna a ding ta a ni.

Zirlai ngawr ngawr piah lamah a in chhiar zau hle baw a. Manorama Yearbook leh Oxford Atlas bu te hi a chhiar nasa hle thin a ni. Tin nitin chanchinbu hi chhiar lovin a awm ngai lo va, Eng emaw vanga a chhiar loh palh hlauh chang chuan hrehawm a ti thin hle a ni. Henry-a ang hian kan zirlaibua inziak piah lama kan chhehvel leh khawvel huapa thilthleng hrang hrangte hi hriat chian zel tum ila, lehkhahu leh chanchinbu chhiar tam te hi uar ila, nakin zelah engkawng pawh zawh dawn ila kan tan a tangkai hun a lo awm zel dawn a ni.

Social Media leh Internet a hman tangkai hle baw. MPSC Combine Competitive Examination a hmachhawn dawn khan notes leh article tam tak internet atangin a download a, learning apps tha tak tak Playstore atangin hmu mai theih vek a ni a, sum tam tak sen ngai lovin awlsam takin a download theih mai baw sia zirlai tan chuan a tangkai em em a ni. Kei ni pawh hian Social Media leh Internet kan hman tam ta hle mai a. Hengte hi a tha lama hman thiam chuan thil tangkai tan a ni thei thung. Social Media(Eg. facebook) te hi news item chhiar nan te pawh thil tangkai tak a ni thei a, chutih rual erawh chuan kan zirlai tibuai tur khawp a nih chuan khawih tlem a, khawih chin tur kan insiam a pawimah hle.

Henry-a nuna kan entawn tur leh pakhat chu Harsatna inrah behtir loh hi a ni. A nu leh pate hi thingtlang kuthnathawk an ni a, an chhungkaw khawsak pawh a harsa ve thin hle a ni. A nu leh pa hian zirna hi an ngai pawimawh em em a, an zir theihna tur a nih dawn phawt chuan retheih leh harsa taka awm phawh an hreh ngai lo. Heng harsatna te hian amahah chhelna a thlen a, an khawsak harsatna chu inrah behtir a tum lova midang hriatthiamna a neihtir zawkin a hria a ni. Hlawhtlin ngei tuma a beih chuan a tawpah heng harsatna te hi hneh hun a la awm dawn a ni tih chiang takin a hria a, a tul hunah chuan thing te a phur a, tui te a chawi a, atheih ang angin nu leh pate a pui ve thin a ni. Chhungkaw khawsak leh dinhmuna a lo zir lo deuh emaw, kan duh angin exam -anah result tha kan nei lo emaw a nih pawhin Henry-a ang hian hma lam pana, hmasawn zel tura ke pen a pawimawh tih hria ila. Chhungkaw dinhmuna hi a pawimawh ber tawh lova, mi taima leh mi thiam tan chuan khawiah pawh hlawhtlinna kawng hi a awm zel a ni tih hriain hma lam panin theihtawp chhuah zel ang che.

**Zirna hian tawpchin a nei lova, kan damchung hian kan zir belh zel a ni.**

**COMPUTER LEH A CHHEHVEL**

1. Pentium hi a tirah chuan a hming hi 80586 vuah tum ani a, a chhan chu 80x86 chip's atanga siam / chhawm tel vang a ni. Mahse, Company dang AMD (Advanced Micro Devices), Cyrix leh company dang dang ten an rawn hman ve theih avangin 'Pentium' tiin an thlakta zawk a ni.
2. Kan tunlai khawvela pawisa leng vel zawng zawng a 10% chauh hi a taka kan hman (physical money) a nia, a dang zawng zawng chu Computer leh kaihnhawih atang a che vel a ni.
3. A tlangpuiin mihringte hian minute khat ah vawi 20 vel mit kan khap thin a. Mahse, computer hmaa kan thuta computer kan hman hian minute khatah vawi 7 vel chauh mit kan khap thin tih mithiam ten an hmu chhuak.
4. Tun lai Company lar HP, Microsoft leh Apple hote hian thil pakhat inangna an nei a, an thil siam chhuah tan dawn hian Garage atang vekin an siam tan ani.
5. Captcha lam pum chu, 'Completely automated public Turning test to tell computers and humans apart' tih a ni a. Kan profile leh thil pawimawh a kan login dawna computer hmang tu chu mihring a ni ngei em tih lo chian tura an duan leh hman a ni.
6. Computer Mouse hi kum 1964 vela Doug Engelbart-a siam niin, thing hmangin a siam a ni.
7. Computer-a pawimawh em em mai Harddisk hi kum 1979 khan an lo siam chhuak tawh a. Mahse, a capacity chu 5mb chauh a la ni.
8. Kum 1980 ah 1GB hard disk an siam chhuah chu 550 pounds (250 Kg) dawna rit a ni a. A man zat pawh \$40,000 zet a ni.
9. Kum 1936 khan Russia chuan tui hmang Computer a lo siam chhuak tawh a ni.
10. 'Windows' kan tih hi a hming tak chu Interface Manager a ni

**HRINGNUN****HLAWHCHHAMNA**

Poland mi Piano thiam hmingthang Ignace Paderwski khan piano zir a tum lai chuan zirtirtu tur chuan i kut a te lutuk a, keyboard hi i thiam thei lovang, a ti a.

Italian zaithiam Enrico Caruso pawh a zai zir dawn chuan a zirtirtu chuan i aw chu tukverh a thlithaw lut ri nen a in-ang hle mai, a lo ti baw a.

Queen Victoria hun laiin England Parliament-ah Benjamin Disraeli khan thu sawi ve a tum a, member ten an lo nuihzat a, thut pahin, "Tunah hian ka thu naa, ka thusawi in ngaithlak hun hi chu a la thleng dawn khawp e," a tia a. A hnuah chuan Prime Minister naupang ber leh thusawi thiam ber a ni.

Henry Ford (Ford motor company hotupa) pawh khan an motor car siam hmasak berah chuan a hnungzawnga kalna (back gear) a siam theihngihl ve tho ani.

Thomas Edison pawh khan thil thar hmun belh atumna lamah dollar maktaduai hnih zet a hmang a, a hmuh chhuah thar chu a tangkai nep viau lehngal.

Albert Einstein pawh kha university entrance exam a beih hmasak tum chuan a tling bik hau lo.

A vawikhatnaa hlawhchham avang ringawt chuan beidawn tur a ni lo. Mi ropui tak takte leh mi hlawhtling tak takte hi a tirah an hlawhtling nghal vek bik lo. Beidawna leh manganna ten a bei ve tho. Mahse, chung zawng zawng chu an in hneh tir lova, hneh turin tan an la thar zawk thin.

**KEIMAHNI**

Issue hmasa, HSCL result a kan tih hmaih palh Zarzomawii D/o SK Kaia, Govt. Diakkawn High School a mi chu II<sup>nd</sup> Division-ah a passed baw a ni. An chungte leh chhiartu zawng zawngte in mi ngaihdamna kan dil nghal e.

**THLAWHNA LO HAW TE ZAWM TUR KAIHHRUAINA****No.1471/2020-2021**

Mizoram mi leh sa India ram hmundanga tangkhangte thlawhnaa lo haw dan tur leh lo dawnawn dan turah mumal zawka hma lak a nih theih nan "Thlawhnaa Lo Haw te Zawm Tur Kaihhruaina" chu Disaster Management & Rehabilitation Department chuan a hnuai mi ang hian a siam.

**THLAWHNA LO HAWTE ZAWM TUR**

- 1) Thlawhnaa lo haw tur ten air ticket lak fel hnuah Mizo Welfare kaltlangin document thehluh ngaite thehlutin Home Department-ah haw phalna permit an la ngei tur a ni. Ni 25 May hnu lamah chuan mCovid- 19 mobile application kaltlangin phalna hi lak tawh tur a ni.
- 2) Lengpui Airport lo thlenin Mizoram Sorkarin inkaihhruaina a siam apiang zawm tur a ni.
- 3) Airport chhunga hnathawkte nen 2 mts-a hlaa awm tur a ni.
- 4) Airport thlen hnuah thil lei leh vah darh phal a ni lo.
- 5) Airport chhungah leh pawnah hmaikawr (mask) vuah reng tur a ni.
- 6) Duh ang diak diaka thil a kal lo a nih pawhin chhel tak leh dawhthei taka awm leh hrethiam turin kan inngen a ni.
- 7) Thil eina kawr leh bawhlhlawhte paih mai mai loh tur a ni a, a paihna hmuna ruatah chauh paih tur a ni ang.
- 8) Thlawhnaa lo hawte chu Lengpui Airport-ah Rapid Antibody Test (RAT) neih vek tur a ni.
- 9) Deputy Commissioner atanga Home Quarantine phalsakna lehkhaneite chu private motor-in hruai theih an ni ang. Amaherawhchu, motor khalhtu driver bakin an lam tur a ni lo.
- 10) Home Quarantine phalsakna nei lo (Sawrkar Quarantine facility emaw Community quarantine facility-a lut tur)-te chu Sawrkarin Lengpui atanga kalna tur motor a buatsaihah chauh chuan tur a ni a, Private motor-in chhung ten inhmuah leh hruai phal a ni lo.
- 11) Sawrkarin a ruahman lirtheia kal emaw mahni lirtheia hawte chu kawnglakah chhuk emaw chawlh a rem lo ang. Mahni awmna tur Quarantine Facility emaw mahni in inkhung hranna tur pan nghal tur a ni ang.
- 12) Aizawl khawpawm mi lo thlengte chuan Sawrkarin a ruahman transit point-ah Sawrkar buatsaih motorin an kal ang a, transit point atangin an District pan dan tur chu an Deputy Commissioner theuh ten ruahmanna an siam angin an kal ang. A tul chuan transit Quarantine Facility-ah an riak ang. Home Quarantine phalsakna lehkhaneite chu transit point/ transit quarantine facility-ah chhungte inlamtir a rem lo.
- 13) Harsatna neite chuan Pu Alexander V Chongtho, Nodal Officer (Ph: 9612166025) leh Pu Zarzoliana, Dy SP (Security), Lengpui Airport (Ph: 943619ti246) hnenah hriattir tur a ni.
- 14) Baggage trolley hman loh tur.